

Sentupadas regularas cun las autoritads

Radunonza generala dalla Cuminonza d'interess Tujetsch la dumengia a Sedrun

DA HANS HUONDER / ANR

■ Igl atun vargau ei la Cuminonza d'interess Tujetsch vegnida fundada da possessurs da secundas habitaziuns ed affittaders permanents d'immobilias. Alla radunonza generala la dumengia avonmiezdi a Sedrun ha la suprazionza da quella saviu trer ina bilanza positiva dallas empremas activitads. Las tariffas ella nova lescha da turissem dallas vischnauncas da Tujetsch e Mustér han caschunau discussiuns. Sin fundament da quellas ein cuminonzas d'interess dils possessurs da secundas habitaziuns seformadas. Quella a Sedrun ei vegnida fundada igl atun vargau e la dumengia avonmiezdi ha ella salvau sia emprema radunonza generala ordinaria a Sedrun. La cuminonza presidiada dalla anteriura cussegliera naziunala Vreni Müller-Hemmi ha fixau pliras finamiras en ses statuts. Aschia duei la suprazionza rgirar in dialog regulau cun las autoritads per exempel pertuccont taxas e tariffas adequatas per la purschida turistica. Medemamein emprova ella da s'engaschar en favur d'in svilup persistent turistic en collaboraziun cun indigens interessai sco era organizaziuns localas e regiunalas. Las commembras ed ils commembers dalla cuminonza d'interess duein vegnir orientai regularmeins davart las activitads.

Legreivla resonanza

Tenor Müller-Hemmi ei il diember da bunamein 300 commembras e commembers dalla cuminonza fetg legreivels: «Quella resonanza conferma claramein las finamiras, en emprema lingia il dialog constructiv cun la vischnaunca ed ulteriurs gremis.» Ell'emprema sentupada cun ina delegaziun dalla suprazionza communal seigi vegniu contonschiu in consens concernent in brat da meisins e



Vreni Müller-Hemmi ei presidenta dalla Cuminonza d'interess Tujetsch.

FOTO H. HUONDER

temas prioritars. Tenor la presidenta ademplescha l'egliada ch'ins ha saviu dar ellas taxas da hospes e turissem ils criteris dalla trasparenza: «Quei ei la basa per in dialog sin la medema altezia. En quel eis ei pusseivel da far valer ils giavischs dalla cuminonza d'interess.» La finamira dalla cuminonza ei da s'entupar quarter gadas ad onn cun las autoritads. En vesta a quellas definescha la suprazionza mintgamai ils basegns d'informaziun. «L'emprema sentupada ha mussau che la vischnaunca ha interess vid in dialog in-

stituzionalisau cun la Cuminonza d'interess Tujetsch. Ella ha purtau emprems resultats giavischai», constatescha Müller-Hemmi. L'entschatta november 2015 ha la cuminonza repartiù l'emprema newsletter allas commembras ed als commembers. Suenther che la vischnaunca ha fatg ina nova cunvegientscha da prestaziun cun Sedrun Mustér Turissem vul la cuminonza era tschercar il contact cun l'organizaziun da turissem. En planisaziun ei era ina sentupada comunabla dalla cuminonza e la vi-

schnaunca da Tujetsch cun l'Andermatt Sedrun Sport SA.

Tschentar prioritads

Tenor il supraziont Kurt Baumgartner pagan ils possessurs da secundas habitaziuns annualmeins rodund 750 000 francs el rom dalla lescha da taxas da turissem. Quei ei rodund 70 pertschien dallas entradas sin fundament da quella lescha en Tujetsch. Dallas entradas totalas dad 1,35 milliuns francs van 840 000 francs a Sedrun Mustér Turissem, il rest alla vi-

schnaunca da Tujetsch. «Nus giavischein ch'ina part essenziala dils daners che nus paghein mondi en favur da nus e che las taxas s'augmentien buc ils proxims onns. Ils daners duein vegnir impundi concentrau, efficient e persistent», puntuescha Baumgartner. Denter auter giavischas la cuminonza ch'ins porschi era enzatgei pigl unviern, analog alla purschida gratuita dalla stad. Quei giavisch ei la vischnaunca gia suadada. Il pass per la loipa duei esser egl avegnir ina purschida gratuita pils possessurs da secundas habitaziuns. Medemamein duei l'informaziun vegnir migliurada. Cun sia tabla nera duei la vischnaunca informar egl avegnir davart fatgs politics ed administrativs. Alla radunonza ein ulteriurs giavischs vegni explicai. Denter auter dapli artechels per tudestg ella Tuatschina ni soluziuns da cumpra e dil traffic public pils loghens pli lunsch naven sco Dieni, Rueras ni Cavorgia. Plinavon ei vegniu constatatu che Tujetsch porscha bia sil sector dalla cultura, mo che bia vegn buca communicau sufficientamein. Il president communal Beat Röschlin ha mussau capientscha pils giavischs e basegns dils possessurs da secundas habitaziuns. Medemamein ha el orientau davart entgens projects sin rucca, sco per exempel la sanaziun ed engrondaziun dil Bogn Sedrun. La suprazionza communal sustegni era il project per la pendiculara da Sedrun el territori da skis da Mustér. Enteifer Sedrun Mustér Turissem hagian ins reglau differents detagls sco per exempel ils duers dall'administraziun e dil meinafatschenta. El ha denton era constatatu che la vischnaunca da Tujetsch impunda bia daners per la purschida turistica, daners che derivan buca dallas taxas dil turissem. All'emprema radunonza generala ordinaria dalla Cuminonza d'interess Tujetsch ein beibein 120 persunas separticipadas.

L'agricultura svizra – denter politica e fiera

Da registrar ein success, mo era grondas sfidas

■ (anr/gc) Markus Ritter, cusseglier nazional e president dall'Uniu purila svizra, ei – tenor pader Pirmin Gnädinger che ha substituiu tier il Forum claustral venderdis vargau pader Urban – prest permanentamein presents ellas medias, buca sco il pli grond, mo bein sco il pli ault pur en nosa tiara. Quei ei capeivel cun siu dun oratoric, perschasiun palpabla ed in entusiassem detg contagiuis. Ins ha era sentiu quei duront ch'el ha referiu davart. «L'agricultura svizra denter success e sfidas». Quei semuossi il meglier ella politica sco era sin la fiera. Mo el sesenti bein e sestenti da representar ils interess giustificai per aschia puder migliurar l'existenza, e surtut l'entrada, da biebein 53 000 menaschis purils en Svizra. El vegli mo il meglier per ses «affidai».

Producers, elaborators e la fiera

Il cusseglier nazional cristiandemocrat da S. Gagl, Markus Ritter, ha ciumscret las structures dalla fiera agrara. Quella sepleighi denter ils purs-producers, ils elavuraders da lur products e la vendita sin fiera. Mo ual 5% dils products agrars vegnien vendi direct dils purs als consumers. Tut igl auter succedi enteifer la cadeina da creaziun da valur.

Midadas considerablas

El decours dils davos 25 onns ha ei dau midadas radicalas sil camp agrar. Succedi ei quei tras: Ecologisaziun, professiunalisaziun dils menaschis (che vegnan adina pli gronds), specialisaziun, instituir cuminonzas da producers, mena-

schis e vendita. Mo era ils sistems da segirar qualitat, emplenir nischas cun products e specialitads e surtut la promozion dalla vendita ei s'extendida. La persistenza ei contonschida ton pertuccont economia, ecologia sco socialesser.

Las sfidas han buca muncau

Ei ha dau difficultads tier la realisaziun dalla politica agrara (2014–2017) cun consequenzas pils menaschis. Stentas grondas ha ei duvrau per segirar il credit da rama all'agricultura. Specialmeins tier il latg ein problems denter l'agricultura e la fiera semussai. Mo cun contracts da vendita selaschi il prezi persuenther segirar. Vitier vegn aunc ch'ils cercchels dalla protecciun digl ambient e dils animals han adina fatg pli grondas pretensiuns. Era il squetsch, che deriva tras il svilup silla fiera agrara internaziunala, seigi considerabls.

Mo ei dat era perspectivas positivas

La fiera mundiala per vivonda creschi ad in crescher. Quei augmenta era la schanza da puder producir dapli vidualias saunas, persistentas e segiras. – L'agricultura cun ses products survegn bunas notas. Ils consumers han gronda fidonza ella producciun agrara svizra. Quei atesta era l'aulta acceptanza. La maioritad dil pievel tegni igl agid finanziel dil maun public all'agricultura per giustificaus.

Plans pigl avegnir

Quella presti bia en favur dil generesser e per la cultivaziun dalla tiara insum-



Cuss. naz. Martin Candinas, interessau auditor, cuss. naz. Markus Ritter, referent, e pader Pirmin Gnädinger, organisatur.

MAD

ma. In cert prighel ensiaran las treis strategies, applicadas pli e pli dils menaschis purils: Tgi vul crescher, auters gudignar accessoriamein ed ulteriurs extendi pli e pli. Sliagir idealmeins selaschi quei sulet sche las famiglias purilas recaltgeschien ord lur lavur in'entrada cumparegliabla cun quellas d'autras professiuns.

Sin plaun nazional duei la politica agrara 2022plus vegnir concretisada tras ina reglamentaziun ch'ei en preparaziun, plinavon cun ina ulteriura revisiun dalla lescha dalla planisaziun spaziala e tras prolungir naven da 2018 la lescha dalla tecnica da gens. Quei ensiari perspectivas positivas per las famiglias purilas ed era la generaziun futura. Surtut seigi e d'ha-

ver bien quitaun per saver dar vinavon la basa agrara existenziala (funs e terren) alla generaziun vegnenta.

Il referent ha era allegau l'iniziativa federala «Per segirar il nutriment egl avegnir», lantschada dall'Uniu purila svizra. Quella hagi gia cattau bien sustegn el cussegl nazional ed el recamon-di fetg da sustener quella.